

CHÊ BIADE UNITÂT

Intai comizis, inte propagande minude e sui sfueis scuasit ducj i autonomiscj si sbracin a zurâ e sperzurâ che l'ordenament regjonâl "dentri dal cuadri de unitât taliane" nol à di rompi ni di indebolî la tressadure unitarie dal paîs, ma che al à anzit di infuartîle.

I unitaris, di ogni colôr, no si lassin trop convinci di chestis promessis, sigûrs che il lengaç dai autonomiscj al è nome un spieli pes odulis, un espedient par fâ proselits, par cuietâ i scrupui patriotics de plui part dai furlans e par vinci la partide a Rome. O crodìn che i unitaris sul stamp dal avocat Linusse a vebin reson.

La unitât taliane, come che e je stade imbastide dal 1861 e mantignude fintremai cumò, e je un fat purementri politic, une etichete esteriôr, une robe sfuarçade, une vernîs, une parvence tignude sù di une sole pegnule, chê dal acentrament burocratic e militarist, e nudride cun inizions e sclîçadis di propagande nazionalistiche. Gjavait il scambi dal personâl burocratic, di un cjâf a chel altri de penisule, tirait vie lis prefeturis e lis cuesturis metudis simpri intes mans di forescj; tocjait l'ordenament des scuelis cun dute la messedance di mestris e professôrs e cui libris di test severementri controlâts e dumiesteâts "ad usum Delphini"; rompêt la trame o l'urdît des aministrazions incjadenadis al centri, lassait un fregul di respîr aes lenghis e dialets e o viodarês dulà che e va a finîle cheste raze di unitât.

pre Bepo - Patrie dal Friûl - 1947